

ԳԻՏՈՒԹՅՈՒՆՆԵՐԻ ԱԿԱԴԵՄԻԱՅԻ ԸՆԴՀԱՆՈՒՐ ԺՈՂՈՎԸ

1963 թ. դեկտեմբերի 23—25-ր տեղի ունեցավ Հայկական ՍՍՌ գիտությունների ակադեմիայի ընդհանուր ժողովը՝ նվիրված ակադեմիայի ստեղծման 20-ամյակին:

Ժողովին մասնակցում էին գիտնականներ, բազմաթիվ գիտահետազոտական հիմնարկների աշխատողներ, բարձրագույն ուսումնական հաստատությունների պրոֆեսորներ, դասախոսներ, մայրաքաղաքի հասարակայնության ներկայացուցիչներ:

Բացելով ընդհանուր ժողովը ԳԱ պրեզիդենտ, ակադեմիկոս Վ. Համբարձումյանը ասաց. —20 տարի առաջ, 1943 թ. նոյեմբերին, Հայրենական մեծ պատերազմի ծանր օրերին, ՍՍՌԿ Ժողովուրդի որոշմամբ հիմնադրվեց Հայաստանի գիտությունների ակադեմիան: Ակադեմիայի ստեղծումը հանդիսանում է ազգային գիտության, կուլտուրայի և տեխնիկայի զարգացման, Սովետական Հայաստանի ժողովրդական տնտեսության հետագա ծաղկման նկատմամբ մեր կուսակցության ու կառավարության կողմից ցուցաբերած հոգատարության վկայությունը:

Անցած երկու տասնամյակներում ակադեմիայի սիստեմում կազմակերպվել են նորագույն տեխնիկայով հագեցված մի շարք գիտահետազոտական ինստիտուտներ և լաբորատորիաներ, որոնք ունեն գիտատեխնիկական հարուստ բազա և լավագույն կադրեր:

Այսօր,—ասաց նա,—մենք խոր հարգանքով ենք հիշում հայագիտության այնպիսի կլասիկների, ինչպիսիք են Հրաչյա Աճառյանը, Հակոբ Մանանդյանը և հանրապետության ուրիշ հնագույն գիտնականներ, որոնք մտնում էին ակադեմիայի առաջին կազմի մեջ և ջանք չէին խնայում հայրենական գիտության զարգացման համար:

Ակադեմիկոս Վ. Համբարձումյանը, այնուհետև, խոսեց մեր հանրապետության գիտական կենտրոնի նվաճումների, նրա առջև դրված նոր խնդիրների մասին: Նա նշեց, որ ներկայումս ավելի մեծ ու պատվավոր խնդիրներ են դրված գիտնականների առջև: Առաջին հերթին անհրաժեշտ է զարգացնել գիտության հիմնական, ինչպես և երիտասարդ, հեռանկարային ճյուղերը, ավելի ամուր կապ հաստատել արտադրության, ժողովրդական տնտեսության հետ:

Խոսելով ՍՄԿՊ Կենտկոմի դեկտեմբերյան պլենումի որոշումների մասին, ակադեմիկոս Վ. Համբարձումյանը Հայաստանի գիտնականների առջև խնդիր դրեց՝ հայտնագործություններով ու նորամուծություններով օգնել հանրապետության գյուղատնտեսության և արդյունաբերության բնագավառի աշխատողներին և միացյալ ջանքերով լուծել քիմիայի զարգացման խնդիրները:

Ընդհանուր ժողովը լսեց մի շարք զեկուցումներ: «Գալակտիկաների կորիզները և նրանց ակտիվությունը» թեմայով հանդես եկավ ակադեմիկոս Վ. Համբարձումյանը, որը ժողովի մասնակիցներին հաղորդեց տարիներ շարունակ Բյուրականի աստղադիտարանում կատարվող հետազոտական աշխատանքների արդյունքները՝ գալակտիկաների և նրանց կորիզների կառուցվածքի մասին: Հայ աստղագետները մշակում են գալակտիկաների միջուկներում տեղի ունեցող ֆիզիկական պրոցեսների տեսությունը: Զեկուցման ընթացքում ցուցադրվեցին Բյուրականի աստղադիտարանի աշխատողների, ինչպես նաև ուրիշ աստղագետների կողմից լուսանկարված գալակտիկաներ:

Ակադեմիկոս Մ. Ներսիսյանի զեկուցումը նվիրված էր «Կովկաս քսոքլած դեկարրիստների մասին» թեմային: Նա հաղորդեց այն նոր տվյալները, որոնք տարիների ընթացքում ի հայտ է բերել երկրի մի շարք քաղաքների արխիվներում:

Ժողովի մասնակիցները հետաքրքրությամբ լսեցին նաև ակադեմիկոս Մ. Զրբաշյանի՝ «Հետազոտություններ միարժեք անալիտիկ ֆունկցիաների ներկայացման տեսության շուրջը», ակադեմիկոս Մ. Տեր-Կարապետյանի՝ «Միկրոօրգանիզմների կողմից ամինաթթուների և սպիտակուցների սինթեզման պրոբլեմները», ակադեմիկոս Գ. Դավթյանի՝ «Հողի տիպերը և նրանց քիմիաբանական պրոբլեմները», ակադեմիայի թղթակից-անդամ Մ. Սիմոնովի՝ «Հայաստանի թեթև լցուկները և նրանց օգտագործման հեռանկարները», ակադեմիայի թղթակից-անդամ Լ. Խաչիկյանի՝ «XVII դարի հայ վաճառական Հովհաննես Զուղայեցու հաշվեմատյանը, որպես կարևոր

աղբյուր Հնդկաստանի, Նեպալի և Տիբեթի տնտեսական կյանքն ուսումնասիրելու համար» զեկուցումները:

Ընդհանուր ժողովում ակադեմիկոս Ա. Բ. Կարինյանը ընթերցեց ՍՍՌՄ գիտությունների ակադեմիայի պրեզիդենտ, ակադեմիկոս Մ. Վ. Կելդիշի ողջույնի հեռագիրը՝ Հայաստանի գիտությունների ակադեմիայի 20-ամյակի կապակցությամբ:

Ընդհանուր ժողովը լսեց նաև կազմակերպչական հարցեր: Փոփոխություններ մտցրեց ակադեմիայի կառուցվածքում: Նախկինում գոյություն ունեցող չորս բաժանմունքի փոխարեն ստեղծվեց հինգ բաժանմունք: Քիմիական գիտությունը ռեսպուբլիկայում արագ թափով առաջ տանելու համար ստեղծվեց քիմիական գիտությունների բաժանմունք, որի ակադեմիկոս-քարտուղար ընտրվեց Ա. Մնջոյանը: Վերակառուցման կարգով ստեղծվեցին նաև ֆիզիկա-տեխնիկական և մաթեմատիկական գիտությունների բաժանմունք (ակադեմիկոս-քարտուղար Մ. Ջրբաշյան) և Նրկրի մասին գիտության բաժանմունք (ակադեմիկոս-քարտուղար Հ. Մաղաբյան):

Ակադեմիայի ընդհանուր ժողովին մասնակցում էին Հայկական ՍՍՌ Գերագույն սովետի նախագահության նախագահ, ակադեմիկոս Ն. Հարությունյանը, Հայաստանի կոմունիստական կուսակցության Կենտկոմի Երկրորդ քարտուղար Հովհ. Բաղդասարյանը:

Ա. Ս.